

ვახტანგ გორილაძე



რას მოგვითხრობს
მიტროპოლიტი ანანია ჭაფარიძე
არიან-ქართლზე



ISBN 978-9941-16-517-7



9 789941 165177

ვახტანგ გოილაძე

რას მოგვითხრობს
მიტროპოლიტი ანანია ჭაფარიძე
არიან-ქართლზე



გამომცემლობა „საქართველოს მაცნე“

წიგნში ცნობილი მეცნიერის ვახტანგ გოილაძის მიერ განალიზებულია მიტროპოლიტ ანანია ჯაფარიძის ნაშრომი ქართველთა უძველესი ქვეყნის „არიან-ქართლის“ შესახებ. ისტორიული „არიან-ქართლი“ ამჟამად თურქეთის საზღვრებშია მოქცეული, მას ბიზანტიურ ეპოქაში „იბერიის თემი“ ეწოდებოდა და ის ძირითადად ქართველებით („ივერებით“) იყო დასახლებული. საქართველოსაგან პოლიტიკურად დაშორებული ეს მხარე მე-6, მე-7 საუკუნეებში სომხური ეკლესიის იურისდიქციის სფეროში აღმოჩნდა, მე-8 საუკუნის შემდეგ აქაურმა მრევლმა გადაიგდო სომხური ეკლესიის უღელი და დაუბრუნდა დედა-ქართული ეკლესიის წიაღს, შესაბამისად არაქისპირეთის, ანისის, ყარსის, ბასიანის, ტაოსა და არზრუმის რეგიონების ივერებმა ეკლესია-მონასტრებში აღიდგინეს ქართულენოვანი წირვა-ლოცვა და შექმნეს სახელმწიფო სახელწოდებით „ქართველთა სამეფო“ (ტაოს სამეფო). ამ ვრცელ მხარეში მრავალი ქართული საეპისკოპოსო ამოქმედდა – ანისის, ყარსის, ვალაშკერტის, დადაშენისა, არზრუმისა და სხვა. მაღალყოვლადუსამღვდელოესი მიტროპოლიტი ანანია აღწერს ამ საეპისკოპოსოთა მრევლის ისტორიას, რომელსაც კარგ შეფასებას აძლევს ვახტანგ გოილაძე.

მარიამ თოგუხაშვილი

რედაქტორი მარიამ თოგუხაშვილი
დაკაბადონება ლია მოსეშვილი

© ვახტანგ გოილაძე, 2017

ISBN 978-9941-16-517-7



მეუფე ანანია ჯაფარიძის ბრწყინვალედ გამოცემული მონოგრაფია – „არიან-ქართლი. საეპისკოპოსოები ისტორიულ ივერიაში“ 566 გვერდია და 17 თავისაგან შედგება. მასზე დართული 23 რუკა და ფოტოები მკითხველისათვის კიდევ უფრო მიმზიდველს ხდის წიგნს, ხოლო პირთა, გეოგრაფიულ და ეთნიკურ სახელთა საძიებელი საშუალებას იძლევა ჩვენთვის საინტერესო საკითხებს ადვილად მივაკვლიოთ.

ქართველ მკითხველთაგან მრავალს, მართალია, **მეუფე ანანიას** მონოგრაფიის გამოქვეყნებამდეც კარგად ეცოდინებოდა არიან-ქართლი რატომაც ჩვენთვის საინტერესო, მაგრამ მე მაინც მინდა ის ცნობები წარმოვადგინო, რომლებიც არიან-ქართლის შესახებ ძველ ქართულ წყაროებშია, მკითხველს გავაცნო **მეუფე ანანიას** წიგნის გამოსვლამდე ვინ რა აზრისა იყო არიან-ქართლზე.

არიან-ქართლის შესახებ ქართულმა სამეცნიერო საზოგადოებამ 1888 წელს „მატბერდის კრებულის“ აღმოჩენისას შეიტყო, ხოლო მას შემდეგ რაც 1890 წელს ექვთიმე თაყაიშვილმა „მატბერდის კრებულში“ შესული „მოქცევაჲ ქართლისაჲს“ ტექსტი გამოაქვეყნა, მასში მოხსენიებულმა არიან-ქართლმა ქართველ მკვლევართა დიდი ინტერესი გამოიწვია. ეს ინტერესი დღესაც არ შენელებულა.

„მოქცევაჲ ქართლისაჲ“ ორი ნაწილისაგან შედგება – პირველია „ქრონიკა“, ხოლო მეორე, წმინდა ნინოს „ცხოვრება“. არიან-ქართლის შესახებ ცნობა სწორედ „ქრონიკაში“ არის. მასში ნათქვამია: თითქოს, ალექსანდრე მაკედონელს, ქართლში ლაშქრობისას „თანაჰყვანდა. . . აზოჲ, ძჳ არიან-ქართლისა მეფისაჲ, და მას მიუბოძა მცხეთაჲ საჯდომად და საზღვარი დაუდვა მას ჰერეთი, და ეგრის წყალი, და სომხითი და მთაჲ ცროლისა[ჲ] და წარვიდა“. ქართლში გამეფებული „აზოჲ წარვიდა არ[ი]ან-ქართლად, მამისა თჳსისა და წარმოიყვანა რვაჲ სახლი და ათნი სახლნი მამა-მძუძეთანი, და დაჯდა ძუელ მცხეთას და თანა-ჰყვანდეს კერპნი ღმრთად – გაცი და გა“. „და ესე იყო პირველი მეფეჲ მცხეთას შინა აზოჲ, ძჳ არიან-ქართველთა მეფისაჲ, და მოკუდა“. „შემდგომად მისა დადგა ფარნავაზ“¹.

რაც შეეხება „ქართლის ცხოვრების“ კრებულში შემავალ „მეფეთა ცხოვრებას“ (მის ავტორად XI ს-ში მცხოვრები ლეონტი მროველი ითვლება), მასში „აზოჲ“ აზონად იწოდება, აზოს სამშობლო არიან-ქართლი არ იხსენება, თვით აზონი (აზო) მაკედონელი იარედოსის ძედ და ქართლის დამპყრობად არის დასახელებული². აზონმა თითქოს ქართ-

ლში მეფობისას „შექმნა ორნი კერპნი ვეცხლისანი: გაცი და გაიმ“. აზონის (აზოს) მმართველობა დახასიათებულია როგორც „ჭირი დიდი ნათესავსა ზედა ქართველთასა“, თვით აზონი კი „მესისხლედ“ არის მიჩნეული¹.

„მეფეთა ცხოვრებაში“ არსებული მითითებით, აზონის ქართლში გაბატონებისას, ქართლის გამგებელი „მცხეთის მამასახლისი“ სამარი ყოფილა, მისი ძმისწული იყო ფარნავაზი, რომელმაც დავაჟკაცების შემდეგ ეგრისის ერისთავის ქუჯის, ანტიოქოსისა (იგულისხმება სელევკიდი მეფე ანტიოქე I სოტერი – ძვ. წ. 324-261) და სომეხთა დახმარებით ჯერ „ნაქალაქევესა თანა არტანისასა, რომელსა ერქუა მაშინ ქაჯთა ქალაქი“ აზო და მისი დამხმარე ბერძნები დაამარცხა (აზო ბრძოლაში დაიღუპა), შემდეგ კი „წარვიდა ფარნავაზ და მოტყუენა საზღვარი საბერძნეთისა ანძიადორა, და ეკლევით შემოიქცა. მოვიდა კლარჯეთს და დაიპყრა კლარჯეთი, და წარმოვიდა მცხეთად სიხარულითა დიდითა“².

აი ის მასალა, რაც ძველ ქათულ წყაროებში არიან-ქართლის შესახებ გვაქვს. ძირითადად ამ მასალის გაანალიზებასა და ისტორიული რეალიების დამტკიცებას ეხება მეუფე ანანიას ვრცელი მონოგრაფია. მონოგრაფიაში ასევე დიდი ადგილი ეთმობა ისტორიული საქართველოს ფარგლებს გარეთ არსებული ქართული საეპისკოპოსოების შესწავლას.

1 იქვე, გვ. 20.

2 იქვე, გვ. 23.

1 მოქცევაჲ ქართლისაჲ, შატბერდის კრებული X საუკუნისა. გამოსაცემად მოამზადეს ბ. გიგინეიშვილმა და ელ. გიუნაშვილმა, თბ., 1979, გვ. 320.

2 ლეონტი მროველი, ცხოვრება ქართველთა მეფეთა. ქართლის ცხოვრება. ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ. ტ. I, თბ., 1955, გვ. 18.

მოქცევად ქართლისაჲს „ქრონიკიდან“ და „მეფეთა ცხოვრებიდან“ ზემომოტანილი ტექსტების შინაარსს თუ ჩავუკვირდებით, ადვილად შევამჩნევთ, „ქრონიკაში“ თხრობა ისეა წარმოდგენილი, თითქოს აზოს ქართლში გამეფება ალექსანდრე მაკედონელის თანადგომით მშვიდობიანად მოხდა. შემდეგ მამის სამფლობელოდან აზომ ქართლში ნათესავები – „რვაჲ სახლი და ათნი სახლნი მამამძუძეთანი“ მოიყვანა. ასევე არიან-ქართლიდან შემოიტანა მან გაცისა და გას კერპები. ამ თხრობაში საინტერესოა ერთი დეტალი – „მეფეთა ცხოვრებაში“ აზონი (აზო), მართალია, „მესისხლედ“ და ქართლის დამპყრობლადაა გამოცხადებული, მაგრამ მის მიერ არიან-ქართლიდან შემოტანილი გაცისა და გას კერპები, ქართლში „შექმნილად“ არის გამოცხადებული და ეს კერპები არმაზთან და ზადენთან ერთად ქართველთა სათაყვანებელი ღმერთები გახდა. რაც იმას მოწმობს, აზოს სამშობლოში – არიან-ქართლშიც ქართველთა მონათესავე ხალხი ცხოვრობდა, მაგრამ სად მდებარეობდა ეს ქვეყანა?

მეფე ანანიას მონოგრაფიიდან კარგად ჩანს, არიან-ქართლის ქვეყანა იგივე ქართველთა საცხოვრისი რომ იყო და უძველესი დროიდან მასთან ბევრი რამ გვაკავშირებდა. ჩვენი მკვლევრები სანამ ასეთ დასკვნამდე მივიდოდნენ, არიან-ქართლის ლოკალიზაციის საკითხი დიდი მსჯელობის საგანი იყო. ამიტომ მინდა ამ საკითხზეც მოკლედ მოგიტხროთ.

არიან-ქართლის ლოკალიზაციის საკითხს გარდა იმისა, რომ „ქრონიკის“ ტექსტში „არიანთან“ ერთად „არან“-ის საკუთარ სახელად დასახელება ართულეობდა, იმთავითვე საკამათო გახდა არიან-ქართლი ისტორიული საქართველოს საზღვრებს შიგნით უნდა გვეძია თუ მისგან მოშორებით. „მეფეთა ცხოვრების“ ცნობა იმის შესახებ შიდა ქართლიდან გაქცეული აზონი (აზო) კლარჯეთში რომ გამაგრდა და იქ შეებრძოლა მას ფარნავაზი „ნაქალაქევსა თანა არტანისასა“, შემდეგ ფარნავაზმა როცა „მოტყუნა საზღვარი საბერძნეთისა ანძიაძორა და ეკლესიით შემოიქცა“, „კლარჯეთი დაიპყრო“, მკვლევრებს იმის საბაბს აძლევდა არიან-ქართლად კლარჯეთი მიეჩნიათ. მაგრამ, არიან-ქართლად თუ კლარჯეთს ჩავთვლით, იქ აზონის დაღუპვის შემდეგ ფარნავაზს ანძიაძორში აღარ უნდა ელაშქრა. ანძიაძორიდან კლარჯეთში რადგან ეკლესიის (ესაა ბიზანტიკური ხანის აკილისენეს ტერიტორია¹) გამოვლით დაბრუნდა, ცხადია, ანძიაძორაში ეკლესიის დასავლეთით არსებული მიწები იგულისხმებოდა. ე. ი. დასადგენი იყო ანძიაძორას მდებარეობა – აზოს მამის სამფლობელო ქვეყანა.

1895 წელს გამოცემულ მარი ბროსეს „საქართველოს ისტორიაში“ ფარნავაზის მიერ მოოხრებულ ქვეყანად – აზოს სამშობლოდ მდ. ევფრატისა და მდ. ლიკის სათავეები არის დასახელებული².

1 Меликишвили Г. А., К истории древней Грузии. Тб., 1959, გვ. 47, 282, 291.

2 ბროსე მ., საქართველოს ისტორია. ტფ., 1895, გვ. 23-24.

1906 წელს მოსე ჯანაშვილმა არიან-ქართლად შუა აზიის პროვინცია არიანა მიიჩნია¹. აკად. ივ. ჯავახიშვილის თანახმად, „ქრონიკის“ „არან“ აზოს მამის სახელი უნდა ყოფილიყო, თუმცა ტექსტში შეიძლება ქვეყანაც გვეგულისხმა. მისი სიტყვით, ხელნაწერში შეცდომით წერია „არან“. „მემატიანეს სიტყვები ოდნავ ბუნდოვანია და მკაფიოდ არა ჩანს, „არან“ მეფისა, თუ ქვეყნის სახელი იყო და აზოჲ არან - ქართლისა . . . თუ ქართლის მეფის არანის შვილი იყო². 1940 წელს გამოქვეყნებულ ნაშრომში აკად. ს. ჯანაშია წერდა: „როგორც არ უნდა გადაწყდეს „არიანა“-ს საკითხი, ჩვენ ვფიქრობთ, რომ . . . არიან-ქართლი წარმოადგენს მოგონებას ჰარი-ქვეყნის, როგორც ქართველთა უძველესი საცხოვრისის შესახებ. რეალურად აქ შეიძლება იგულისხმებოდეს როგორც მიტანი, ისე ურარტუც, ვანის ტბის მიდამოები. . . ჰარი-ქვეყანა შეიცავდა ერთსაც და მეორესაც“³. 1948 წელს ე. თაყაიშვილმა სახელი „არიან-ქართლი“ ქართულ ძეგლში „ქვაბი საგანძურიდან“ შეტანილ ცნობად მიიჩნია⁴.

1 ჯანაშვილი მ., საქართველოს ისტორია. ტ. I, ტფ., 1906, გვ. 52-53, 57-62.
2 ჯავახიშვილი ივ., ქართველი ერის ისტორია, წიგნი I, ტფილისი, 1928, გვ. 92.
3 ჯანაშია ს., უძველესი ეროვნული ცნობა ქართველთა პირველსაცხოვრისის შესახებ. . . ენის, ისტორიისა და მატერიალური კულტურის ინსტიტუტის მოამბე, ტ. V-VI, 1940, გვ. 671.
4 თაყაიშვილი ე., საიდან და როგორ გაჩნდა „ქართლის მოქცევის“ ქრონიკებში სახელწოდება „არიან-ქართლი“? საქართველოს მეცნიერებათა აკადემიის მოამბე. ტ. IX, №9-10, 1948, გვ. 624.

არიან-ქართლის ლოკალიზაციისა და შინაარსის გასარკვევად დიდი მნიშვნელობა ჰქონდა ძველი აღმოსავლეთის ისტორიის ისეთი მკვლევრის აზრს, როგორც აკად. გ. მელიქიშვილი იყო. 1959 წელს გამოქვეყნებულ ნაშრომში სახელი „არიანი“ მან სპარსულ სიტყვას „არიულს“ დაუკავშირა და არიან-ქართლში სამხრეთ-ქართული („სპარსულ-ქართული“) რაიონები – ისტორიული სპერის ოლქისა და მდ. ჭოროხის ზემო წელის ის მოსახლეობა დაინახა, რომელნიც აქემენიანთა სპარსეთის მფლობელობაში იყვნენ მოქცეულნი¹.

1968 წელს გ. მამულიამ არიან-ქართლის შესახებ ახალი თვალსაზრისი წამოაყენა. მისი მტკიცებით, ძვ. წ. IV ს-ში აღმოსავლეთ საქართველოს ტერიტორიაზე ორი სახელმწიფოებრივი ერთეული არსებობდა. ერთი იყო „ჩრდილო ქართლი“ ცენტრით უფლისციხესა და ძველ მცხეთაში, მეორე „სამხრეთ ქართლი“ ცენტრით წუნდასა და ოძრხეში. მისი მტკიცებით, სწორედ სამხრეთ ქართლის სახელმწიფოებრივი ერთეულის სახელი იყო არიან-ქართლი². 1970 წელს გამოქვეყნებულ „საქართველოს ისტორიის ნარკვევების“ I ტომში აკად. გ. მელიქიშვილმა არიან-ქართლის შესახებ კვლავ ძველი მოსაზრება გაიმეორა³. 1975 წელს

1 Меликишвили Г. А., დასახ. ნაშრომი, გვ. 118, 278-279.
2 მამულია გ., „არიან-ქართლის“ საკითხისათვის საქართველოს, კავკასიისა და მახლობელი აღმოსავლეთის ისტორიის საკითხები. თბ., 1968, გვ. 222-223.
3 საქართველოს ისტორიის ნარკვევები, ტ. I, თბ., 1970, გვ. 440.

„ქართული საბჭოთა ენციკლოპედიის“ პირველ ტომში მოთავსებულ წერილში – „არიან-ქართლი“ პროფ. კ. გრიგოლიამ იმ დროისათვის ქართულ მეცნიერებაში არიან-ქართლის ლოკალიზაციის შესახებ ყველაზე მისაღები – ს. ჯანაშიას და გ. მელიქიშვილის მოსაზრებები წარმოადგინა¹, ე. ი. ამ ოფიციალური გამოცემის შემდეგაც გაურკვეველი დარჩა – არიან-ქართლში ჭოროხისა და სპერის ოლქების ქართული მოსახლეობა უნდა გვეგულისხმა თუ მითანისა და ურარტუს მხარისა (ვანის ტბის მიმდებარე ტერიტორიები), როგორც ამას აკად. ს. ჯანაშია ფიქრობდა. 1984 წელს გამოქვეყნებულ წერილში მე არიან-ქართლად კაპადოკია ჩავთვალე², იგივე თვალსაზრისი გავიმეორე 1991 წელს გამოცემულ მონოგრაფიებში³; 2002 წელს კი არიან-ქართლად მდ. არცანია-მურად-სუს სამხრეთით მდებარე ტერიტორიებიც მივიჩინე⁴.

- 1 გრიგოლია კ. არიან-ქართლი. ქართული საბჭოთა ენციკლოპედია, ტ. I, თბ., 1975, გვ. 565. 2011 წელს გამოცემულ მონოგრაფიაში „ფარნავაზი და არიან-ქართლის ლოკალიზაცია“ ძველდამოსავლური და ქართული მასალის გაანალიზების საფუძველზე ს. გოგიტიძემ დაასაკვნა: „არიან-ქართლისა და მასთან დაკავშირებული სახელწოდებები მეფეთა, ღვთაებათა და ტოპონიმებისა, თავიანთი წარმომავლობით არის ხათურ-ხეთური (მცირეაზიური) ქართველური(ლახურ-მეგრული) სამყაროდან“. იხ. გვ.135
- 2 გოილაძე ვ., ქართული სახელმწიფოებრიობის სათავეებთან. „მნათობი“, 1984, №11, გვ. 156, 161.
- 3 გოილაძე ვ., ვახტანგ გორგასალი და მისი ისტორიკოსი, თბ., 1991, გვ. 127-133; ქართული ეკლესიის სათავეებთან, თბ., 1991, გვ. 23 და შემდეგი.
- 4 გოილაძე ვ., ასურელ მამათა სამშობლო და საქართველო, თბ., 2002, გვ. 26-32.

არიან-ქართლის ლოკალიზაციის შესახებ მიღებული შედეგები მკვლევართა ნაწილს არ აკმაყოფილებდა. ამიტომ კვლევა ისევ გრძელდებოდა. არიან-ქართლის ლოკალიზაციის საკითხს რამდენიმე გამოკვლევა უძღვნა აკად. ნ. ხაზარაძემ¹. ამ ბოლო ხანს არიან-ქართლის საკითხთან დაკავშირებული წყაროები და სამეცნიერო ლიტერატურა დეტალურად გაანალიზა პროფ. გ. ქავთარაძემ და დაასკვნა: „ცნება „არიან-ქართლი წმინდა მნიგნობრული გზით შექმნილი ფიქციაა, რომელსაც საფუძვლად უდევს მხოლოდ და მხოლოდ ორი (დასავლეთისა და აღმოსავლეთის) იბერიის სახელწოდებათა იდენტურობა“. გ. ქავთარაძის სიტყვით, „მით უფრო უცნაურია ის გარემოება, რომ თანამედროვე ქართულ ისტორიოგრაფიაში ფართოდ არის გავრცელებული და საკმაოდ მყარად ფესვგადგმული გ. მელიქიშვილის მიერ გამოთქმული ვარაუდი, რომლის თანახმად, სახელწოდება „არიან-ქართლი“ არიელთა ანუ სპარსელთა ქართლს უნდა აღნიშნავდეს“².

- 1 ხაზარაძე ნ., საქართველოს ძველი ისტორიის ერთი ასპექტისათვის (არიან-ქართლი), საქართველოს ტექნიკური უნივერსიტეტის შრომები. №3(414), თბ., 1997; მისივე, სამხრეთ-დასავლეთ საქართველოს ისტორიული გეოგრაფიისათვის. თსუ ახალციხის ფილიალის „შრომების კრებული“, II, 2000; მისივე, ლეონტი მროველი და არიან-ქართლის ლოკალიზაციის საკითხი. Dedicatio. კრებული მიძღვნილი აკად. მ. ლორთქიფანიძის 75 წლისთავისადმი, თბ., 2001, გვ. 36, 48.
- 2 ქავთარაძე გ., „არიან-ქართლის“ საკითხისათვის. ისტორიისა და ეთნოგრაფიის ინ-ტის შრომები, IX, თბ., 2009, გვ. 36, 48. ამ მხრივ არანაკლებ ორიგინალურია მ. ჩხარ-

დასახელებულ მკვლევართა შეხედულებები არიან-ქართლის შესახებ სპეციალურად აქვს განალიზებული **მეუფე ანანია**ს, ამიტომ მათზე აქ საუბარს აღარ გავაგრძელებ. იმას კი აღვნიშნავ; მიუხედავად იმისა, რომ არიან-ქართლის ლოკალიზაციის საკითხის შესახებ ჩვენს სამეცნიერო ლიტერატურაში აზრთა სხვადასხვაობაა, მკვლევართა უმრავლესობა თანხმდება: არიან-ქართლი ისტორიული საქართველოს საზღვრებს მიღმა – ჩრდილო მესოპოტამიასა და მცირე აზიის აღმოსავლეთ ნაწილში (დიდი კაპადოკია) არის საძიებელი (ნ. ხაზარაძე).

სწორედ ამ კუთხით იკვლევს **მეუფე ანანია** ახლადგამოცემულ მონოგრაფიაში არიან-ქართლისა და ამ ქვეყნის ქართველურ მოსახლეობასთან დაკავშირებულ სხვადასხვა, მათ შორის, საეპისკოპოსოების საკითხებს. ასეთებია: არიან-ქართლად მიჩნეულ მხარეებში ქართული ენის საკითხი, მოსახლეობის მრწამსი, ეთნიკური ისტორია, საეპისკოპოსოების მდგომარეობა ისტორიული საქართველოს საზღვრებს გარეთ, ქართული თვით-

შემეცნება სომხეთის მფლობელობაში მოქცეულ ქართულ ტერიტორიაზე, სომეხ-ქალკედონიტა ვინაობა, იბერიის თემის მოსახლეობის საკითხი და სხვა მრავალი. ერთი სიტყვით, ჩვენს ხელთაა **მეუფე ანანია**ს მრავალწლიანი შრომის შედეგად შექმნილი მეტად საინტერესო მონოგრაფია.

ნიგნის საკმაოდ ვრცელ „შესავალში“ მკითხველი საქართველოს სამოციქულო ეკლესიის მიერ ავტოკეფალიის მოპოვებასთან დაკავშირებულ თხრობას ეცნობა. მონოგრაფიის პირველ თავში – „არიან ქართლის ხალხი და მიწა-წყალი“ ძველ ქართულ წყაროებში („მოქცევაჲ ქართლისაჲ“, „მეფეთა ცხოვრება“) არიან-ქართლის შესახებ არსებული ცნობებია განალიზებული. ასეთი კვლევისას, ერთი შეხედვით **მეუფე ანანია** აზოს მამის სამფლობელოს ლოკალიზაციით უნდა დაინტერესებულიყო, მისი ადგილმდებარეობა დაეზუსტებინა, მაგრამ მონოგრაფიის დიდ ღირსებად უნდა ჩაითვალოს ის, რომ ამ შემთხვევაში, **მეუფე** ყველა იმ რეგიონზე რომ საუბრობს, სადაც ძველ წყაროთა მითითებებით უძველესი დროიდანვე ქართული ან ქართველური მოდგმის მოსახლეობა ცხოვრობდა. ალბათ მკითხველიც დამეთანხმება, ისტორიული საქართველოს ფარგლებს გარეთ უძველესი დროიდანვე მოსახლე ქართული თუ ქართველური წარმომავლობის მოსახლეობის ეთნოგენეზის საკითხი, მართლაც, მოითხოვს ყოველმხრივ ანალიზს და ასეთ კვლევას **მეუფე ანანია** ძველი ბერძენი გეოგრაფის სტრაბონის (გარდ. ახ. წ. 24წ.)

ტიშვილის თვალსაზრისი. მისი მტკიცებით, აზო/აზონი და იაზონი ერთი და იგივე სახელებია, უფრო ზუსტად ერთი სახელის ვარიაციებია. კომპოზიტ „არიან-ქართლში“ „არიან“ „ქართლის“ მსაზღვრელი კი არ უნდა იყოს, როგორც აქამდე თვლიდნენ, არამედ მისი სინონიმი, - „ქართლი“ და „კოლხისი“ ერთი და იგივეა. ე. ი. „არიან-ქართლი“ ეს იგივე „არიან-კოლხისია“. იხ. მისი ქართული ისტორიული აზრის განვითარება შუასაუკუნეებში: ქართლის სამეფოს დაარსების შესახებ ცნობების შედარებითი ანალიზი. ქართული წყაროთმცოდნეობა XVII-XVIII, თბ; 2015-2016, გვ. 264-266.

ცნობების გაანალიზებით იწყებს. მისი კვლევის საგანი, უპირველეს ყოვლისა, იმ ტერიტორიების მოსახლეობაა, რომლებიც სტრაბონის თანახმად, სელევკიდთა მეფის – ანტიოქოს დიდის (ძვ. წ. 242-187) მხედართმთავრებმა არტაქსიამ და ზარიადრმა (როცა ისინის არმენიის მეფეები გახდნენ) ძვ. წ. II ს-ში ქართველებს წაართვეს. **იბერიელებისგან მიიტაცეს „პარიადრის მთისწინეთი, ხორძენე და გორგარანე, . . . ხალიბებსა და მოსინიკებს ჩამოაჭრეს კარენიტიდა და ქსერქსენე, მცირე არმენიის მოსაზღვრე ნაწილები“ (XI, 14, 5)¹.**

ეს მიწები **მეუფემ**, ვფიქრობ, სამართლიანად მიიჩნია არიან-ქართლის ნაწილებად. როგორც სამეცნიერო ლიტერატურაშია მითითებული და **მეუფეც** წერს, დასახელებულ ტერიტორიებიდან ერთი ნაწილი (მაგ. გოგარენე), მართალია, ქართლის სამეფომ ახ. წ. I-II საუკუნეებში დაიბრუნა (გვ. 23), მაგრამ მანამდეც და მის შემდეგაც სომხური სახელმწიფო ცდილობდა ეს ტერიტორია სომეხთა საკუთრებად გამოეცხადებინა, იქ სომხური ენა დაენერგა. მიუხედავად ასეთი ღონისძიებებისა „აღნიშნული მხარეების მოსახლეობის დიდი ნაწილი თავს ქართველად აცხადებდა“ (გვ. 23). მეუფეს სიტყვით, უფრო გვიან ამ ტერიტორიებზე ჩამოყალიბდა ეროვნული სახელმწიფო „ქართველთა სამეფოს“ სახელწოდებით და მან გაფართოება დაიწ-

ყო ვანის ტბის მიმართულებით. თუ არა ბასილ კეისრის შემოჭრა – დასძენს მეუფე, – და ტაოს ქართველთა სამეფოს დამარცხება, ალბათ ძველი „არიან-ქართლი“ აღიდგენდა თავის თავს. ანუ ქალდეიდან ვანის ტბამდე აღორძინდებოდა ქართველთა ამ რეგიონის მკვიდრი მოსახლეობის სახელმწიფო, ქართული ენითა და ეკლესიისთ (გვ. 24).

როცა ამ სტრიქონებს წერდა, **მეუფე ანანია**, რა თქმა უნდა, არიან-ქართლის ლოკალიზაციის შესახებ აკად. ს. ჯანაშიას თვალსაზრისს იზიარებდა. ბატონ სიმონს არიან-ქართლად ხომ ჰარის ქვეყანა, მითანისა და ურარტუს ტერიტორიების ნაწილი მიაჩნდა.

საქართველოს ძველ ისტორიაში ნაკლებად გაცნობიერებულ მკითხველს შეიძლება კითხვა გაუჩნდეს, „ქართველთა სამეფოს“ მეფეს – დავით III კურაპალატს (გარდ. 1001 წ.) რატომ უნდა გაეგრძელებინა თავისი სამეფოს საზღვრების გაფართოება სამხრეთ-აღმოსავლეთით ვანის ტბის მიმდებარე ტერიტორიებისაკენ?

თავისი დებულების დასადასტურებლად, როგორც მოსალოდნელი იყო, **მეუფე ანანია** კარდუხთა ქვეყნის შესახებ ძველი ბერძენი ავტორის ქსენოფონტეს (გარდ. ძვ. წ. 355 წ.) ცნობებს იმონმებს. როგორც ცნობილია, ძვ. წ. 401 წელს კუნაქსთან (ქ. ბაბილონის ჩრდილო-დასავლეთით) გამართულ ბრძოლაში მარცხის შემდეგ სპარსი უფლისწულის – კიროსის მიერ დაქირავებულმა 10000-იანმა ბერძენ მოქირავნეთა ლაშქარმა შავი

¹ Страбон. География. Перевод, статья и комментарии Г. А. Стратановского, М., 1964, гл. 498.

ზღვის სანაპიროსთან მისასვლელად კარდუხთა ქვეყანაზე გაიარა. მონოგრაფიაში ვრცლადაა განალიზებული ბერძენთა მიერ გავლილი გზის მარშრუტი, მაგრამ ამასთან ერთად მთავარი ისაა, რომ ქართულ სამეცნიერო ლიტერატურაში კარგა ხანია რაც კარდუხები ქართული წარმომავლობის ხალხად, ხოლო მათი სამშობლო – სამხრეთ იბერიად არის მიჩნეული. ამიტომ მეუფე ანანია სამართლიანად მსჯელობს „ორი ივერიის“ შესახებ. ისტორიული საქართველოს სამხრეთით უძველეს დროში „ივერიის“ არსებობის შესახებ, სხვა მასალებთან ერთად, საინტერესოა სტრაბონის მითითება სომხეთის მეფემ ტიგრან II-მ თავის სახელზე ქალაქი „იბერიის მახლობლად“ რომ დაარსა¹ (ვანის ტბის სამხრეთ-დასავლეთით მდებარე ამ ქალაქის – ტიგრანაკერტის ადგილას ახლა სოფ. ფარკინია).

ქართველთა ეთნოგენეზთან დაკავშირებულ ამ მეტად მნიშვნელოვან ფაქტს ჩვენს მეცნიერებაში მაინცდამაინც დიდი ყურადღება არ ეთმობა, მაგრამ მისი იგნორირება არ შეიძლება. კარდუხთა ქვეყანა ჩრდილო შუამდინარეთში მდებარეობდა. ჩრდილოეთით სომხეთისგან მას მდ. კენტრიტი (ახლანდ. ბოხტან-სუ. აკად. ივ. ჯავახიშვილი ჰიდრონიმ კენტრიტის სახელს მდ. კინტრიშთან აიგივებდა²) ყოფდა. როგორც ქსენოფონტე წერს,

1 იქვე, გვ. 501 (XI, XIV, 15). ტექსტის მთარგმნელმა გ. სტრატანოვსკიმ ასეთი მითითება შეცდომად მიიჩნია და შენიშვნაში მიუთითა: „ამ ადგილებში იბერიის ქალაქები არ იყო“ (გვ. 824).

2 ჯავახიშვილი ივ., ქართველთა სხვადასხვა სატომო სახელე-

ბერძნებმა კარდუხთა ქვეყნის გავლას შვიდი დღე მოანდომეს და ამ დროის განმავლობაში მათ განუწყვეტელი ომი ჰქონდათ კარდუხებთან. კარდუხები კარგად იყვნენ დაუფლებულნი თავდასხმისა და უკანდახვევის ტაქტიკას. ბრძოლისას მღეროდნენ. კარდუხთა მდიდარი სოფლები მთებზე იყვნენ შეფენილნი. კარდუხები მისდევდნენ მესაქონლეობას, მევენახეობას და, როგორც მეუფეც უთითებს, ღვინო მინაში ჩასმულ შემოგლეხილ ქვერებში ჰქონდათ დაყენებული (გვ. 49). კარდუხთა ქვეყნიდან ბერძნები არმენიელთა ქვეყანაში შევიდნენ, შემდეგ ხალიბების, ტაოხებისა და ფასიანების ტერიტორიაზე (გვ. 50)¹.

ქსენოფონტეს თანადროული კარადუხთა ქვეყანა აქემენიდური სპარსეთის მფლობელობაში იყო და როგორც ითქვა, ის ისტორიული საქართველოს სამხრეთით – ვანის ტბის სამხრეთით მდებარეობდა.

ეს ყველაფერი კარგი, მაგრამ იმაში რომ დავრწმუნდეთ, კარდუხთა ქვეყანა ძველად რომ ქართველთა მონათესავე ხალხის საცხოვრისი იყო, მეტი მასალაა საჭირო. ქვემოთ შევეცდები კარდუხთა ქვეყნისა და ვანის ტბის მიდამოებში – ისტორიულ არიან-ქართლში, ქართველთა ცხოვრების შესახებ **მეუფე ანანიას** მონოგრაფიიდან სხვა მასალაც მოვიტანო, შემდეგ კი მისი თვალსაზრისი კიდევ უფრო გავამყარო.

ბი, სამშობლო და უძველესი ბინადრობა. ქართველი ერის ისტორია, წიგნი I, თბ., 1960, გვ. 414.

1 ამ საკითხზე ვრცლად იხ. გოილაძე ვ., ასურელ მამათა სამშობლო, გვ. 44-48.

ის ადგილები, სადაც ძვ. წ. V ს-ის დამლევს ქსე-ნოფონტეს ლაშქარმა გაიარა და კარდუხთა განსახლების არეალი იყო, ახლა ქურთების საცხოვრისია. ამიტომ მეტად საინტერესოა კარდუხთა შთამომავლების შემდგომი ბედი?

მკვლევრები უთითებენ კარდუხთა ნაწილის ჩრდილოეთით – საქართველოს ტერიტორიაზე გადმოსახლების შესახებ (კ. ლემან-ჰაუპტი, ივ. ჯავახიშვილი), მაგრამ ეს იმას არ ნიშნავს, ამ გადმოსახლების შემდეგ კარდუხთა ძველ მიწა-წყალზე ქართველური მოდგმის ეთნოსს არსებობა შეენწყვიტა. ადრექრისტიანულ ხანაში კარდუხთა ქვეყნის მთავარი ქალაქი ნისიბისი განთქმული იყო თავისი სკოლა-აკადემიით. აკად. კ. კეკელიძის თქმით, ძველ საქართველოში განათლებისა და სწავლა-აღზრდის საქმე სწორედ ნისიბისის სკოლის ყაიდაზე იყო აგებული¹. მართალია, ბ. კორნელი არ წერს ძველ საქართველოში რა გზით დაინერგა აღზრდისა და განათლების ნისიბისეული სისტემა, მაგრამ ფაქტი ერთია – კარდუხთა ქვეყანა ედესის ოლქთან ერთად ძველი შუამდინარეთის ერთ-ერთი კულტურულად დაწინაურებული მხარე იყო. ასე რომ, **მეუფე ანანიას** მონოგრაფიაში ვრცლად რომაა წარმოდგენილი კარდუხთა ქვეყნის და ხალხის ისტორია სრულიად გამართლებულია.

ახ. ნ. 363 წელს რომსა და ირანს შორის დადებული ზავით კარდუხთა ქვეყანა ირანის მფლობე-

ლობაში მოექცა. ქ. ნისიბისის სკოლა-აკადემიამ ქედესაში გადმოინაცვლა. ქვეყანა დატოვა ქრისტიანული მოსახლეობის ნაწილმა და ედესაში გადასახლდა (ნისიბისიდან გადასახლებულთა შორის იყო ადრექრისტიანული ხანის ცნობილი მოღვაწე ეფრემ ასური). კარდუხთა ქვეყნიდან ქ. ედესაში გადასულმა ქრისტიანებმა, ასევე კაპადოკიიდან და ისტორიული საქართველოდან ქ. ედესაში სასწავლებლად თუ საცხოვრებლად ჩასულმა ქართველებმა შექმნეს ის კოლონია, რომელიც V-VI საუკუნეების ქ. ედესაში არსებობდა¹. აღნიშნულით უნდა აიხსნას, ვახტანგ გორგასლის დედამ – დედოფალმა საგდუხტმა და დამ – ხვარანძემ **8** წელი ქ. ედესაში რომ გაატარეს². ჩემი მხრივ უნდა აღვნიშნო: მისასალმებელია ის, რომ ქ. ედესაში ქართული კოლონიის არსებობის შესახებ ჩემი მიკვლევა **მეუფე ანანიას** მონოგრაფიაშიც რომაა ასახული (გვ. 45).

ვანის ტბის მახლობლად მცხოვრები ქართველური მოდგმის ტომებზე საუბრისას **მეუფე** არაერთხელ ახსენებს ლუვიას. ძვ. წ. IV ს-ში მცხოვრები ბერძენი ავტორის მეგასტენეს ცნობაზე დაყრდნობით **მეუფე** წერს: მეგასტენეს ცნობით, „ლიბიის“, იგივე ლუვიის მეზობელი იბერიის ერთი ნაწილი ნაბუქოდონოსორმა აყარა და დაასახლა პონტოს-პირეთში. ამის შემდეგ **მეუფე** დასძენს: „ლიბიის“

1 გოილაძე ვ., ასურელ მამათა სამშობლო, თავი VIII.

2 ჯუანშერი, ცხოვრება ვახტანგ გორგასლისა. ქართლის ცხოვრება. ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ, ტ. I, თბ., 1955, გვ. 196.

1 კეკელიძე კ., ქართული ლიტერატურის ისტორია. ტ. I, თბ., 1960, გვ. 80.

ქვეშ უნდა იგულისხმებოდეს არა აფრიკის ლიბია, არამედ მცირე აზიაში მდებარე ქვეყანა ლუვია (გვ. 9). „ლურსმულ ეპოქაში, – განაგრძობს **მეუფე**, – მცირე აზიის ლუვია ცნობილი სახელმწიფო იყო, რომელიც მდებარეობდა ახლოს იმ არეებთან, სადაც შემდგომი ავტორები კარდუხების საცხოვრისს მიუთითებენ“ (გვ. 10). „თუ მეგასტენეს წყაროს „ლიბია“ იგივე ქვეყანა „ლუვიაა“, მაშინ ძველი ავტორები“, როგორც ჩანს, მიუთითებენ ნაბუქოდანოსარის მიერ იბერების პონტოსპირეთში ჩასახლების შესახებ. „ლუვია-ლუბარის“ ქართველებთან კავშირის შესახებ, – დასძენს **მეუფე**, – წერენ ეპიფანე და არქანჯელო ლამბერტი. არქანჯელოს, – განაგრძობს **მეუფე ანანია**, – მოჰყავს ძველი ცნობა, რომ ლუბია ერქვა ქვეყანასა და მთას არარატის რეგიონში, ანუ ძველ ურარტუში. ასევე შესანიშნავია ეპიფანეს სიტყვები, იმის შესახებ ლუბარის მთიანეთი „სომეხთა და ქართველთა ქვეყნების შუა რომ მდებარეობდა (გვ. 10). **მეუფე ანანია** ამ მასალის მოტანის შემდეგაც არაერთხელ ეხება „ლუვიის“ მოსახლეობის საკითხს, მაგრამ მასზე აქ სიტყვას აღარ გავაგრძელებ და მინდა მოკლედ უტიების შესახებ მოგიხსნათ.

მეუფე ანანიას თანახმად, უტიებიც კარდუხთა გვერდით ცხოვრობდნენ (გვ. 131). ეს ხალხი, როგორც ჩანს, იმ ძველი მამუქების შთამომავლები იყვნენ, რომლებიც ძვ. წ. XII ს-ში კაპადოკიიდან (მცირე აზიის აღმოსავლეთ ნაწილიდან) ევფრატის ზემო დინების აღმოსავლეთით (თანამედროვე მდ.

მურად-სუს სამხრეთით) გადასახლდა. 50 წლით ადრე მათ ხელთ იგდეს ალზისა და ფურულუმზის ქვეყნები, ხოლო ასურეთის მეფის ტიგლათფილესერ I-ის მეფობის დასაწყისში (ძვ. წ. 1115 წ.) 20 ათასმა მამუქმა მეომარმა და მათმა 5-მა მეფემ ქვეყნა ქათმუხიც დაიპყრო¹. მამუქთა განსახლების ამ მიდამოებში **მეუფე ანანია**მ ძველ წყაროებში დამოწმებული უტიებიც დაინახა და ისინი არიანქართლის მოსახლეობას დაუკავშირა (გვ. 131).

ჩრდილო შუამდინარელი უტიების (იგივე „ორტას ოლქის“ მცხოვრებთა) შესახებ ჩემი მხრივ უნდა დავსძინო: VI ს-ის სირიელი ავტორი იეშუ სტილიტი „ორტაიების“ საცხოვრისად ანძიტენეს ოლქს – ოსროენის (ამ მხარის ცენტრი იყო ქ. ედესა) ჩრდილოეთით მდებარე ტერიტორიას ასახელებს². ოსროენის ჩრდილოეთით მდებარე ანძიტენე (ალზი) კი, როგორც ზემოთ ვნახეთ, აღმოსავლეთ მამუქთა განსახლების არეალი იყო. ამ

1 გიორგაძე გრ., „მუშქაია“, „მუშქი“ და „დაიაენი“ „დაიანი“ ასურულ ლურსმულ ტექსტებში. კრებული – მესხეთი. ისტორია და თანამედროვეობა. ახალციხე, 2000, გვ. 5-6; ცნობილი რუსი აღმოსავლეთმცოდნის ი. დიაკონოვის თანახმად, „აღმოსავლეთის მუშქების“ განსახლების ძირითადი ცენტრი იყო ზემო ევფრატთან მდ. არცანიის (მურად-სუ) შესართავთან მდებარე ალზის სამეფო. ასურული წყაროები, – დასძენს ი. დიაკონოვი, – ალზის აგრეთვე მუშქთა ქვეყანას უწოდებენ. აღმოსავლეთის მუშქები მდ. ტიგროსის ჩრდილო შენაკადების სათავეში მდებარე მთებიდან ზემო ევფრატის დასავლეთით მდებარე ტავრის მთებამდე უნდა ყოფილიყვნენ განსახლებულნი. იხ. История древнего мира, т. II, М., 1982, გვ.47.

2 Хроника Иешу Стилита. Н. В. Пигулевская, Месопотамия на рубеже V-VI вв. н. э., М.-Л., 1940, гв. 143.

მხარის მოსახლეობას სომხებისა და სირიელებისაგან განსხვავებული ენა ჰქონდა. ცნობილი სომეხი ისტორიკოსის ნ. ადონცის თქმით, ეს ხალხი იოანე ეფესელთან (VI ს.) „ურტაერებად“ (ე. ი. „ურარტეზებად“ ვ. გ.) იხსენიებიან და ვინმე იოანე წარმოშობით სირიელი, მის თანამედროვეთა თქმით, თურმე ისე კარგად ფლობდა ურტაერების ენას, რომ ძნელი იყო მისი სირიელად მიჩნევაო¹.

საეჭვო არაა, **მეუფე ანანიას** მიერ კარდუხთა მეზობლად დასახლებული „უტიები“ (იგივე ურარტელები) და სირიელი ქრონისტის იეშუ სტილიტის მიერ მოხსენიებული „ორტას მცხოვრებნი“, ერთი და იგივე ეთნიკური კუთვნილებისანი რომ უნდა ყოფილიყვნენ. ისინი როგორც ჩანს, ძვ. წ. XII ს-ში მცირე აზიის აღმოსავლეთ ნაწილიდან მდ. ევფრატის გადაღმა გადასული და ურარტელთა ქვეშევრდომობაში მოხვედრილი ძველ მუშქთა შთამომავლები იყვნენ. XIII ს-ის სომეხი ისტორიკოსის თომა არწრუნის ცნობით, მის თანადროულად სასუნის მთებში ჯერ კიდევ შემორჩენილი იყო ხალხი სომხებისაგან განსხვავებული ენით (როგორც ცნობილია, ურარტუს სახელმწიფოს დანგრევის შემდეგ, მის ტერიტორიაზე სომხები დასახლდნენ), რომელნიც გაფანტულნი ცალკე ოჯახებად ცხოვრობდნენ. მათი ასიმილაციის შედეგად არაერთი ქართული სიტყვა შევიდა სომხურ ლექსიკაში (შეადარ., მეუფე ანანიას ნაშრომში, გვ. 384).

როგორც ცნობილი ჩეხი მეცნიერი ბედრჟიხ ჰროზნი წერს, კარდუხთა ქვეყანა თუ ძველი მი-

თანის სახელმწიფოს ცენტრს წარმოადგენდა და კარდუხების განსახლების არეალი ადრეულ ხანაში ქ. ურფა-ედესის რაიონსაც (ოსროენის პროვინცია) მოიცავდა, მაშინ აღარ უნდა გაგვიკვირდეს ნმინდა მართას და მისი ძის – სვიმიონ უმცროსის ცხოვრებაში რატომაა მრავლად ცნობები შუამდინარელი ქართველების შესახებ¹. მათგან მხოლოდ ერთს წარმოვადგენ. ნმინდა სვიმიონს ხილვა ჰქონდა, რომ მასთან – საკვირველ მთაზე აღმოსავლეთიდან მივიდა „ერი დიდძალი ფ-დ მამათა და დედათა და ყრმათა. და აქუნდა ჴელთა მათთა ჯვრები და მოვიდოდეს იგინი. . . ლიტანიითა და ლოცვითა“. „სულმან ნ-მან“ სვიმიონს ჰკითხა – „ვინ იყვნენ მოსულელები“? სვიმიონმა უპასუხა: „ესე არს ნათესავი ქართველთა“. რომელნი. . . „კ-დ დაემკვდრნენ მათგანნი მონასტერსაცა შენსა“-ო. ამ ხილვიდან მცირე ხნის შემდეგ აღმოსავლეთიდან მართლაც „მოვიდა ერი მრავალი ქართველთა ლიტანიითა და აქუნდა ჴელთა მათთა ჯ-რები“².

ქ. ანტიოქიის (მდ. ორონტზე ზღვისპირა სირიაში) მახლობლად საკვირველ მთაზე მყოფ სვიმიონთან აღმოსავლეთიდან მისული „ნათესავით ქართველები“, რა თქმა უნდა, ედესა-ურტას რაიონებიდან უნდა ყოფილიყვნენ. ყველაფერს რომ თავი დავანებოთ, მარტო ვახტანგ გორგასლის

1 გოილაძე ვ., ასურელ მამათა სამშობლო. . . , გვ. 134-135. მისივე, ანტონ ქართველი და სვიმიონ მესვეტე. ჟურნალი „ქართველოლოგია“, 2013, №2.

2 ცხოვრება სვიმიონ მესვეტისა. ქართული ჰაგიოგრაფიული ძეგლები, კ. კეკელიძის რედაქციით კომენი I, ტფ., 1918, გვ. 260-261.

1 Адонц Н., Армения в эпоху Юстиниана, СПб, 1908, გვ.31, შენ 3.

„ცხოვრებაში“ არსებული ცნობა – ჯაზირეთის (ჩრდილო შუამდინარეთი) ნახევარი რომ ქართველთა საკუთრება იყო, და ვახტანგ მეფის დედამ და დამ 8 წელი რომ გაატარეს ქ. ედესაში¹, **მეუფე ანანია**ს სრულ საფუძველს აძლევდა არიან-ქართლის პრობლემებთან დაკავშირებული საკითხების კვლევისას კარდუხებისა და ურტას ქვეყნებზეც ესაუბრა. მკითხველისათვის გაეცნო ისტორიული საქართველოს საზღვრებს გარეთ მცხოვრები ქართველური მოდგმის ხალხების რელიგია და კულტურა. ყოველივე ეს, ჩემი აზრით, მონოგრაფიის ავტორის მრავალმხრივი მეცნიერული ინტერესების გარდა, მის დიდ პატრიოტულ სულისკვეთებაზე მიუთითებს. პატრიოტიზმის გარეშე ძნელი იქნებოდა ამ სქელტანიანი მონოგრაფიის შექმნა.

ჩრდილო შუამდინარელ ქართველებზე თხრობა მინდა ერთი ცნობით, რომელსაც ცოტა ხნის წინ გავეცანი, დავასრულო. 1917 წელს გაზეთ „სამშობლოს“ (№537. 27. I) და „ცნობის ფურცელში“ (№184. 31. I) გამოქვეყნდა ერთი და იგივე წერილი, რომელშიც პირველი მსოფლიო ომის დროს აღმოსავლეთ თურქეთში მომხდარი ერთი ამბავია აღწერილი. საომარი მოქმედების დროს რუსმა ჯარისკაცებმა დაატყვევეს ერთი აისორი, რომელმაც ქართულის გარდა სხვა ენა არ იცოდა. მან წერილის ავტორს ილიკო ფალიანსა და სამხედრო ექიმს – გიორგი ნიჟარაძეს უამბო: ქ. დიარბაქირიდან (ესაა ჩრდილო შუამდინარეთის ძველი ქალაქი

ამიდა, ზემონახსენები იოანე ეფესელის სამშობლო) სამხრეთ-დასავლეთით 140 ვერსის დაშორებით არის ქართველთა 8 სოფელი (ჩამოთვლილია სოფლების სახელები. ვ. გ.) დაახლოებით 12000 მცხოვრებით. მათ აქვთ თავიანთი ეკლესიები, სადაც ღვთისმსახურება „გურჯულ ენაზე სწარმოებს“. ჩვენ აისორები – ორი პატარა სოფლის მოსახლეობაც სალოცავად ქართველების ეკლესიაში დავდივართ. „ქართველების მღვდლები გვნათლავენ და გვმარხავენ“-ო. ამის შემდეგ ილიკო ფალიანი დასძენს: „საჭიროა ქართველმა ჯარისკაცებმა მხედველობაში იქონიონ ზემოაღწერილი ამბავი, ვინ იცის ბრძოლის პირმა იქნებ მიაღწიოს აღნიშნულ ადგილებამდე. ნუ დაივიწყებენ, რომ იქ ჩვენი ძმები ყოფილან. ამ ამბის უფრო დაწვრილებით გაგება და ძმების ნახვა-მოვლა ყოველი ჩვენგანის მოვალეობაა“.

ახლანდელი ქ. დიარბაქირის სამხრეთ-დასავლეთით 140 კმ. დაშორებით სწორედ ასურული ნყარობის ალზის, ასევე ოსროენისა (ცენტრ. ქ. ედესა) და ურტას ოლქების ყოფილი ტერიტორიებია, ამიტომ, ვფიქრობ, საეჭვო არაა XX ს-ის დამდეგისათვის იქ მცხოვრები 12000-მდე ქრისტიანი ქართველი, იმ ქართველების შთამომავლები რომ უნდა ყოფილიყვნენ, რომლებიც ოსროენისა და ურტას ტერიტორიებზე ცხოვრობდნენ და წმინდა მართასა და სვიმიონის „ცხოვრებებში“ იხსენიებიან. ამ ქართველების შემდგომი ბედი უცნობია. ურიგო არ იქნება საქართველოს ეკლესია და ცალკეული

1 ჯუანშერი, დასახ. თხზ., გვ. 182.

პირები თუ დაინტერესდებიან იმ ქართველთა შთამომავლების ბედით, რომლებმაც უძველესი დროიდან ისტორიული საქართველოდან დაშორებით ათასწლეულების მანძილზე ენა და ქრისტიანული მრწამსი XX საუკუნის დამდეგამდე შემოინახეს.

როგორც აღვნიშნე, არიან-ქართლის ადგილმდებარეობის ძიებისას მკვლევართა ნაწილი მას საქართველოს სამხრეთ-დასავლეთით ძველი კაპადოკიის მიწა-წყალზეც ათავსებდა და შესაბამისად **მეუფე ანანიას** მონოგრაფიის გარკვეული ნაწილი მუშკთა განსახლებისა და კაპადოკიის ქართველური სამყაროს მოსახლეობის პრობლემებს ეთმობა. პროფ. გ. გოზალიშვილის დასკვნა „პონტო-კაპადოკია-ქართლი-ეგრისი ერთიანი ეთნიკური სამყარო რომ იყო და ერთიანი კულტურით ცხოვრობდა“¹, ახლა საკამათო აღარაა, მაგრამ მაინც მისასაღმებელია, **მეუფე ანანიას** მონოგრაფიაში მუშქ-მესხებთან და კაპადოკიასთან დაკავშირებულ საკითხებს დიდი ადგილი რომ ეთმობა. გარდა იმისა, რომ მეუფე დეტალურად ანალიზებს მუშქ-მესხთა შესახებ ძველ წყაროთა მონაცემებს, ცალკე მსჯელობს იმ ისტორიკოსთა ნააზრევზე, რომელთაც მცირე-აზიური ძველი სამყაროს შესახებ აქვთ ნაშრომები. ასეთებია: პროფ. თ. მიქელაძე (გვ. 71-77), აკად. ნ. ხაზარაძე (გვ. 77-81, 106-117), პროფ. გ. გოზალიშვილი (გვ. 81-97) ადელე ბაღლი და პროფ. ო. ლორთქიფანიძე (გვ. 97-100), პროფ. გ. ქავთარაძე (გვ. 100-106), პ. ინგოროყვა (გვ. 117-119).

1 გოზალიშვილი გ., ორი ეტიუდი პონტოსა და კაპადოკიის ცხოვრებიდან, თბ., 1965, გვ. 43.

მკითხველმა შეიძლება იკითხოს – რა საჭირო იყო კაპადოკიის შესახებ ყველა იმ მკვლევრის ნააზრევის წარმოდგენა, რომელთაც კაპადოკიაზე, მუშქებზე და, საერთოდ, იმ მხარის მოსახლეობაზე, ქალაქებსა თუ საეკლესიო ცენტრებზე აქვთ ნაშრომები?

მონოგრაფიის სათანადო ადგილების გაცნობისას მკითხველი დარწმუნდება – ასეთი დიდი შრომა **მეუფე ანანიას** საქართველოს ისტორიის, კულტურის, ძველი კაპადოკიის მოსახლეობასთან ქართველთა კავშირების წარმოსაჩენად და, აზოს სამშობლოს – იგივე არიან-ქართლის (ვინრო გაგებით) ლოკალიზაციის ნათლად განსასაზღვრავად აქვს ჩატარებული. **მეუფის** მტკიცებით, მის მიერ ლოკალიზებული არიან-ქართლი (გვ. 108), ის ტერიტორიები იყო, სადაც შემდეგ V ს-ის შუა ხანებში ვახტანგ გორგასალმა ირანელებთან ერთად ილაშქრა. რა თქმა უნდა, ამ მხარის მოსახლეობის ქართველურმა წარმომავლობამ და „პონტო-ქალაქის“ (სინოპის) ალების შემდეგ დატყვევებული სასულიერო პირების – პეტრეს და სამოელის საეკლესიო საკითხების ცოდნის მაღალმა დონემ განაპირობა, ვახტანგ მეფემ ქართლის ავტოკეფალური ეკლესიის პირველი საჭეთმპყრობლის ტახტის დასაკავებლად პეტრე კაპადოკიელი რომ შეარჩია (პეტრე კაპადოკიელის გარდაცვალების შემდეგ ქართლის საკათალიკოსო ტახტი ასევე ვახტანგ მეფის მიერ პეტრესთან ერთად გაცნობილმა სამოელ კაპადოკიელმა დაიკავა). კაპადოკიელთა მიმართ ვახტანგ

გორგასლის ასეთი ქმედება იმაზე მიგვანიშნებს, ძველ ქართველებსაც კაპადოკია ქართველური სამყაროს ნაწილად, ხოლო მისი მოსახლეობა ქართველებად რომ მიაჩნდათ და მათთან დანათესავებას ისწრაფვოდნენ. გავიხსენოთ: ქართველთა განმანათლებლის წმიდა ნინოს კაპადოკიური წარმომადგენლობა. ქართლის პირველი ქრისტიანი მეფის მეუღლე – ნანა დადოფალიც წარმოშობით ხომ კაპადოკიიდან იყო, კაპადოკიიდან იყო ეგრისის ეკლესიის პირველი ეპისკოპოსი იბერის ძე და სხვანი. ცაკლე უნდა აღინიშნოს სამი დიდი კაპადოკიელი მამის – ბასილ დიდი კესარიელის, გრიგოლ ნოსელისა და გრიგოლ ნაზიანზელის დიდი პატივისცემა საქართველოში (ბასილ დიდის მოსხენიების დღეს 1 იანვარს საქართველოს თითქმის ყველა ოჯახში ცხვებოდა კაც-ბასილას კვერი (იხ. სტ. ბასილი. ქართ. საბჭ. ენციკლოპედია, ტ. II, თბ., 1977).

ზემოთ არიან-ქართლზე საუბრისას იმაზე მივუთითე, აზოს ქართლიდან განდევნის შემდეგ მის მიერ არიან-ქართლიდან შემოტანილი გაცისა და გას კერპები ქართველებმა არმაზისა და ზადენის (ასევე სხვა) კერპებთან ერთად სათაყვანებლად რომ გაიხადეს. მეტად მნიშვნელოვანია მოქცევა ქართლისაჲს „ქრონიკის“ ავტორის მიერ ამ ფაქტზე მითითება. საქმე ისაა, რომ სტრაბონი კაპადოკიაში მიუთუთებს „მას“ კერპის არსებობის შესახებ¹. აქ თუ იმასაც გავითვალისწინებთ, აკად. გრ. გიორგაძის თანახმად, ხეთების ძველი დედაქალაქის ხა-

თუსას (ახლანდ. ბოლაზქოი თურქეთში) ჭიშკარზე ხეთურ ენაზე არსებული კერპთა ტრიადის წარწერა ზუსტად რომ იმეორებს წმიდა ნინოს „ცხოვრებაში“ ჩვენთვის კარგად ცნობილი კერპების აღწერას¹ და აქ ერთ-ერთი კერპის სახელია „ხაცი“, დროული მოგვეჩვენება მონოგრაფიაში კაპადოკიის მოსახლეობის ქართველური წარმომადგენლობის სამტკიცებლად **მეუფე ანანიას** მიერ მოხმობილი წმ. ნინოს სიტყვები: ეს კერპები (იგულისხმება გა და გაცი. ვ. გ.) თქვენი (ქართველთა. ვ. გ.) არიან-ქართლელი მამების (ე. ი. წინაპრების. ვ. გ.) ღმერთები იყვნენო. ასევე, როცა მირიან მეფე მიმართავს წმინდა ნინოს, გაცისა და გას „ჩვენი მამების ძველ ღმერთებს“ უწოდებს². დაბოლოს მნიშვნელოვანია **მეუფე ანანიას** მიერ არაერთხელ დამონმებული არსენ ბერის (XII ს.) სიტყვები: „ჩუენ ქართველნი შვილნი ვართ მათ არიან ქართლით გამოსრულთანი და ენა მათი უწყით“-ო³.

მეუფე ანანიას მიერ კაპადოკიის, როგორც ქართული სამყაროსადმი კუთვნილებისა და აზოს სამშობლოდ – არიან-ქართლად მისაჩნევად მოხმობილი ზემომოტანილი სიტყვები მკითხველში დიდ პატივისცემას აღძრავს კაპადოკიისადმი და მადლობა უნდა მოვახსენოთ მეუფეს კიდევ ერთხელ რომ

1 გიორგაძე გრ., „ხეთურ-არმაზული ტრიადები“. „მნათობი“, 1985, №7, გვ. 152, 153-156.

2 მოქცევა ქართლისაჲ, შატბერდის კრებული, გვ. 335, 340.

3 არსენ ბერი, ცხოვრება და მოქალაქეობა და ლუაწლი ნინოსი. ძველი ქართული აგიოგრაფიული ლიტერატურის ძეგლები. ნ. 3, თბ., 1971, გვ. 47.

1 Страбон, География, გვ. 504 (XI, II, 3).

გაგვასხენა და მოგვატარა ჩრდილო შუამდინარული და კაპადოკიური ქართული სამყარო – ძველი არიან-ქართლი (ფართო გაგებით). ასე, რომ შემთხვევითი არ იყო, 1204 წელს თამარ მეფემ პონტოს კაპადოკიის ტერიტორიაზე ტრაპიზონის იმპერია რომ შექმნა. **მეუფე ანანია** სიტყვით, უცხოელე-ბი ტრაპიზონის იმპერატორს ხომ „კოლხთა მეფეს უწოდებდნენ“ (გვ. 146). აქვე უნდა გავიხსენოთ ქ. ტრაპიზონი ანდრია პირველწოდებულის „მიმოსვლის“ ძველ ქართულ თარგმანში „სამეგრელოს ქალაქად“ რომ იწოდება¹.

სწორედ აღნიშნულის გამო შესტკივა გული **მეუფე ანანია** ისტორიული საქართველოს საზღვრებს გარეთ მცხოვრებ ქართველთა ბედზე და ზემოდასახელებული ქართული მოსახლეობის არმენიზაციის (გასომხების) პროცესთან დაკავშირებულ საკითხებზე მონოგრაფიაშიც მსჯელობს, მიუთითებს უცხოელთა (ამ შემთხვევაში სომხების) ბატონობის ქვეშ მოქცეულ ქართულ ტერიტორიებზე მცხოვრებ მოსახლეობაში ქართული ენის დევნის ფაქტებზე (გვ. 163-164). მცირე აზიის ტერიტორიაზე კაპადოკიურ-ქართული ეთნოსის წარმომადგენლები იდევნებოდნენ ბიზანტიურ ხანაშიც. აღნიშნულის გამოძახილადაა მიჩნეული ბასილ დიდის სიტყვები – „მე მომიწოდებს ჩემი ტანჯული სამშობლო“-ო².

1 მიმოსვლა ანდრია მოციქულისა. ძველი ქართული თარგმანის ტექსტი გამოსაცემად მოამზადა და გამოკვლევა დაურთო მალხაზ კობიაშვილმა, თბ., 2008, გვ. 187.
2 გოზალიშვილი გ., დასახ. ნაშრომი, გვ. 56.

მას შემდეგ, რაც ძვ. წ. VII ს-ში ურარტუს სახელმწიფო დაინგრა, სომხების წინაპრებმა ურარტუს მიწების დაკავება დაიწყეს, ისინი სახლდებოდნენ შავიზღვისპირა რაიონებსა და ისტორიული საქართველოს სამხრეთ-დასავლეთ ოლქებშიც. აღნიშნულმა განაპირობა მონოგრაფიაში **მეუფე ანანია** არაერთხელ რომ ეხება ქართველთა არმენიზაციის საკითხს. ქართველთათვის ეს მტკიცენული პროცესი, სამწუხაროდ გადაგვარებით ემუქრებოდა არა მარტო ანტიკური ხანის ქართველ მოსახლეობას, ახალი დროის ქართველებსაც. როგორც ცნობილია, XVIII-XIX საუკუნეებში ამ პროცესმა ქართლსა და კახეთშიც იჩინა თავი და სწორედ **მეუფე ანანია** იყო ის პიროვნება, რომელმაც ჯერ კიდევ 1999 წელს ცალკე გამოკვლევა უძღვნა ამ საკითხს¹, და შემთხვევითი არაა ამ პრობლემაზე იგი წარმოდგენილ მონოგრაფიაშიც რომ საუბრობს (გვ. 183-247). ანტიკურ ხანაში ქართველური მოდგმის ხალიბების გასომხების საკითხზე ჯერ კიდევ აკად. ივ. ჯავახიშვილი წერდა: ქსენოფონტეს დროინდელი ხალხები პლინიუსთან უკვე სომეხ-ხალიბებად („gens Armenochalybes“) იწოდებიანო².

რა ხდებოდა ძველ ხალიბთა ცხოვრებაში, იყო მათზე ზენოლა რათა მშობლიური ენა დაევიწყე-

1 მიტროპოლიტი ანანია ჯაფარიძე, ქართლ-კახეთი (ქართველთა გასომხება), თბ., 1999. ჯავახეთის ქართული მოსახლეობის ბედისა და გასომხების შესახებ. იხ. შ. ლომსაძე, სამცხე-ჯავახეთი, თბ., 1975, გვ. 364.
2 ჯავახიშვილი ივ., ქართველთა სხვადასხვა სატომო სახელე-ბი, გვ. 42.

ბინათ, არ ვიცით, ამის შესახებ უშუალო მითითებები არ გვაქვს. ისე კი, 1982 წელს რუსულ ენაზე გამოცემულ „ძველი მსოფლიოს ისტორიის“ (ტ. III) ერთი ავტორი წერს: „არც ერთი სახელმწიფო არ ცდილობდა ძალდატანებით დაენერგა თავისი ენა უცხოენოვან მოსახლეობაში. ალბანეთის იმ პროვინციების მოსახლეობას, სადაც სომხები ბატონობდნენ „არავინ უშლიდა სახლებში მშობლიურ ენაზე ესაუბრათო“¹. ალბათ ასეთი ვითარება იყო ძველ ხალიბებსა და ქართველური მოდგმის იმ ხალხებში, რომლებიც სომხური სახელმწიფოს ხელქვეით იყვნენ მოქცეულნი.

არიან-ქართლზე საუბრისას მინდა ახალი ქართლის სამეფოს შემქმნელის ფარნავაზ მეფის ოჯახთან დაკავშირებულ ერთი პირის ვინაობის საკითხსაც შევეხო. „მეფეთა ცხოვრების“ ავტორის ცნობით, როცა ქართლში აზონი (აზო) გაბატონდა, ფარნავაზის მამა (სახელი არაა დასახელებული) და ბიძა – ქართლის მამასახლისი სამარი ბრძოლაში დაიღუპნენ. სამი წლის ფარნავაზი, სამარას ძმისწული დედამ კავკასიის მთიანეთში გახიზნა.

ამ ცნობის გაცნობისას არ შეიძლება არ დაინტერესდე – ვინ უნდა ყოფილიყო ფარნავაზის მამა, რა ფუნქციებს ასრულებდა სამეფოში ფარნავაზის ბიძა სამარი?

დასმულ საკითხთან დაკავშირებით **მეუფე ანანია** ძველი რომაელი ავტორის არიანეს (95-175) ცნობას განიხილავს და წერს: „ფლავიუს არიანეს

ინფორმაციით, ძვ. წ. 329/328 წელს ცენტრალურ აზიელი „ხორეზმელების“ მეფე ფარსმანესი 1500 მხედრის თანხლებით ეახლა ალექსანდრეს მდ. ოქსის (თანამედროვე ამუ დარია შუა აზიაში) ნაპირთან და მოახსენა, რომ იგი ცხოვრობდა კოლხებისა და ამადონელების მეზობლად და მზად იყო დახმარებოდა მას, თუკი ალექსანდრე გადაწყვეტდა იმ ტომების დამორჩილებას, რომლებიც სახლობდნენ პონტოს ევქსინიამდე (ანუ შავ ზღვამდე) გადაჭიმულ მხარეში“ (გვ. 104-105).

1984 წელს ჟურნალ „მნათობში“ (№11) გამოქვეყნებულ წერილში – „ქართული სახელმწიფოებრიობის სათავეებთან“ არიანეს მიერ „ხორეზმელთა მეფედ“ დასახელებული ფარსმანი, რომელიც ალექსანდრე მაკედონელს კოლხებისა და ამაზონების მეზობელი ქვეყნის მეფედ წარუდგა, ფარნავაზის მამად მივიჩნიე (ფარსმანი ფარნავაზიანთა სამეფო სახლში ხომ დინასტიური სახელი იყო) და მივუთითე: ძღვევამოსილ სარდალს ფარსმანი რადგან აზოს მამის ქვეყნის დაპყრობას სთხოვდა (ამ გზით ფარსმანი აზოს მიერ მიტაცებული ტახტის დაბრუნებას ცდილობდა) და თანაც, თავს კოლხთა მეზობელი ქვეყნის მეფედ აცხადებდა, საკმაო საფუძველი გვაქვს ფარსმანი ფარნავაზის მამად და ქართლის მეფედ იქნას მიჩნეული-ო¹.

ძვ. წ. 323 წლის 13 ივნისს ქ. ბაბილონში მოულოდნელად გარდაცვალების გამო ალექსანდრე

¹ გოილაძე ვ., ქართული სახელმწიფოებრიობის სათავეებთან. გვ. 161.

¹ История древнего мира, М., 1982, т. III, гв. 216.

მაკედონელმა, მართალია დანაპირები ვერ შეასრულა, მაგრამ ფარნავაზმა მაინც აღადგინა მამის მემკვიდრეობა. იმხანად ჩემმა გამოკვლევამ ჯერ კიდევ გამოყვეყნებამდე გაალიზიანა ზოგი და მთხოვეს მის გამოქვეყნებაზე უარი მეთქვა, მაგრამ წერილი ბ-ნ არჩილ სულაკაურის „მნათობის“ იმჟამინდელი რედაქტორის ნებით მაინც გამოქვეყნდა. ჩემთვის დიდად მისასალმებელია ის, რომ არიანეს დასახელებული ცნობის გაანალიზებისას **მეუფე ანანია**ც მსგავს დასკვნამდე რომ მივიდა და ფარსმანის ხორეზმიელთა მეფობა უარყო. **მეუფეს** დასკვნით, „ცხადია, არიანეს ტექსტი ეხება შავიზღვისპირეთს და არა ცენტრალურ აზიას: გარდა იმისა, რომ მასში მოხსენიებული არიან კოლხები, ამადონელები და ევქსინის პონტო, ამასვე უნდა მოწმობდეს თვით ალექსანდრეს სიტყვები, ლაშქრობიდან დაბრუნების შემდეგ ჰელესპონტოსა და პროპონტიდის გავლით „გამომართებოდა პონტოსაკენ და ამისათვის გამოიყენებდა როგორც სახმელეთო ისე საზღვაო ძალებს“. „საზღვაო ძალების გამოყენება“, – დასძენს **მეუფე ანანია**, – ცენტრალურ აზიაში მცხოვრები მეფისათვის შეუძლებელი იქნებოდა“-ო (გვ. 105).

არიანეს მიერ კოლხებისა და ამაზონების მეზობელი ქვეყნის მეფედ დასახელებულ ფარსმანს თუ ფარნავაზის მამად და ქართლის მეფედ მივიჩნევთ, მაშინ ახალი მასალით შეივსება ახალი ქართლის სამეფოს შემქმნელისა და ფარნავაზიანთა სამეფო დინასტიის ფუძემდებლის ფარნავაზის ბიოგრაფია.

მისი ბიძის სახელის – სამარის გარდა გვეცოდინება მამის სახელი – ფარსმანი. მონოგრაფიაში **მეუფე ანანიას** მიერ მოხმობილი მასალა ასეთი დასკვნის გამოტანის საფუძველს ნამდვილად იძლევა.

არიან-ქართლის შესახებ **მეუფე ანანიას** მიერ გაანალიზებული ვრცელი მასალა საშუალებას იძლევა დავასკვნათ: ვინრო გაგებით არიან-ქართლი იყო აზოს მამის სამშობლო – პონტოს კაპადოკია. კლარჯეთში აზოს ლაშქრის დამარცხების შემდეგ ფარნავაზმა რომ მოტყვევდა ანდიადორა და ეკლესიის (ბიზანტიური ხანის აკილისენა – აღმოსავლეთ ანატოლიაში) გამოვლით კლარჯეთში დაბრუნდა, სწორედ ასეთი დასკვნის გამოტანა შეიძლება. მეორე მხრივ, ცხადია, არიან-ქართლი იყო ის ტერიტორიები, სადაც უძველესი დროიდან ქართული და ქართველური მოდგმის მოსახლეობა ცხოვრობდა – ესაა ჩრდილო შუამდინარეთში კარდუხთა განსახლების არეალი, ასევე ვანის ტბის დასავლეთით მდებარე ის ტერიტორიები (მდ. არცანია-მურადსუს სამხრეთით), სადაც ძვ. წ. XII ს-ში მუშქები ჩასახლდნენ და რომელთა შთამომავლებს VI ს-ის სირიელი ავტორი იემუ სტილიტი „უტიებს“ (ურარტელებს) უწოდებს. საინტერესოა ის, რომ ძველი სომეხი ისტორიკოსი სებეოსი (VII ს.) სწორედ ამ მხარის მეფედ ასახელებს მეფეს, რომლის სახელი ასევე ფარნავაზი იყო¹.

1 ამ საკითხზე იხ. გოილაძე ვ., ასურიელ მამათა სამშობლო, გვ. 76-77. სტრაბონის ცნობით აკილისენეს მცირე არმენიიდან მდ. ევფრატი (იგულისხმება ამ მდინარის ზემო დინება. ვ. გ.) ყოფდა. Страбон. География, გვ. 521 (XI, III, 28).

„ერთი სიტყვით, - წერს მეუფე ანანია, - „არიან-ქართლში“ იგულისხმება ვრცელი ქვეყანა ტრაპეზუნტიდან („ზღვისპირა დიდი ქალაქიდან“) – კარნუ-ქალაქისა და ანძიადორას (დღევანდელი ერზინჯანის ზეგანის) ჩათვლით. ეს ის მხარეებია, რომელთაც ერქვათ ქალდეა-სპერი-ტაობასიანი და მისი მომიჯნავე ოლქები, ის ქვეყანა, სადაც ქსენოფონტემ ქართველი ტომები აღწერა, ქვეყანა, რომელსაც სტრაბონის ცნობით ჰქონდა მხარეები-ხორძენა, პარიადრე და გოგარენა, იბერიელებით დასახლებული კუთხეები, რომელნიც არმენიამ ჩამოაჭრა ისტორიულ საქართველოს ქრისტეშობამდე II ს-ში.“ „მიუხედავად ისტორიული კატაკლიზმებისა,-დასძენს მეუფე, – ეს მხარეები X-XI საუკუნეებშიც ქართველებით იყო დასახლებული (აქ იმონმებს XI ს-ის სომეხი ავტორის არისტაკეს ლასტივერტცის ისტორიას, გვ. 183 ვგ.)“.

ამიტომ, X ს-ში „ქართველთა სამეფომ“ სწორედ ვანის ტბის მიმართულებით დაიწყო გაფართოება, და თუ არა ბასილ კეისრის შემოჭრა და ქართველთა დამარცხება, „არიან-ქართლი“ თავს ვანის ტბამდე აღიდგენდა, ქართველთა ამ რეგიონის მკვიდრი მოსახლეობის სახელმწიფო, ქართული ენითა და ეკლესიით აღორძინდებოდა“(გვ.22).

როგორც ცნობილია, დავით III კურაპალატის გარდაცვალების (1001 წ.) შემდეგ ბიზანტიის იმპერატორი ბასილ II „დავითის მემკვიდრეობას“ (აქ შედიოდა დავით III-ის მიერ შემოერთებული „ზე-

მონი ქვეყანანი“) დაეპატრონა და იქ იბერიის თემი („Фема Иверии“) შექმნა. ეს ქართული მხარეები კარგა ხნით ბიზანტიის იმპერიის მფლობელობაში დარჩა. ეს მიწები საქართველომ, მართალია დაიბრუნა, მაგრამ დღეს ისევ ჩამოშორებულია საქართველოს. ამიტომაც, რომ იბერიის თემის საკითხთან დაკავშირებით მეუფე ანანია კვლავ უბრუნდება ამ მხარის მოსახლეობის საკითხს და მკითხველს უფრო დეტალურად აცნობს „იბერიის თემის“ მოსახლეობის ბედს.

კერძოდ, არზრუმის, ყარსის, ანისის, ვალაშკერტის, არაქსის ხეობის ერთი ნაწილის მკვიდრ ქართველებს, – წერს მეუფე ანანია, – მართალია, ჰქონდათ ივერიული თვითშემეცნება, ოჯახებში ქართულად ლაპარაკობდნენ, მაგრამ მათი ნაწილი სომხური ეკლესიის (უმეტესად სომხურ ქალკედონური) ეკლესიის მრევლი იყო, ვიდრე მე-8 საუკუნის შუა წლებამდე.

ამის მიზეზი ის იყო, რომ ხორძენას, გოგარენასა და პარიადრეს კალთების მიტაცების შემდეგ (სტრაბ.XI, 14, 5)¹, არმენიის სახელმწიფომ გააგრძელა ყოფილი არიან-ქართლის ნაწილების მიტაცება და ის (აღნიშნული იბერიული რეგიონი), სომხური სახელმწიფოს, მე-4 საუკუნედან კი, სომხური ეკლესიის შემადგენლობაში აღმოჩნდა.

არმენიის მიერ ხელდებული სამხრეთის ივერიის ანუ ყოფილი არიან ქართლის ტერიტორიაზე

1 Страбон. География. Перевод, статья и комментарии Г. А. Стратановского, М., 1964, гв. 498.

მცხოვრები ქართველები ცდილობდნენ როგორმე თავი დაეღწიათ სომხური ეკლესიისგან, განშორებოდნენ მას და ეკლესიებში აღედგინათ ქართულენოვანი წირვა-ლოცვა.

მართლაც, დიდი ძალისხმევითა და ღვაწლის შედეგად - წერს **მეუფე ანანია**, - ტაოს, ბასიანის, არზრუმის (კარინის), ვანანდის და მიმდებარე რეგიონების ივერებმა ეკლესიებში აღადგინეს ქართულენოვანი წირვა-ლოცვა, რაც საფუძველი გახდა ტაოს ქართული სახელმწიფოს აღდგენისა.

ეს პროცესი იყო მრავალსაუკუნოვანი, გამოძახილი და შედეგი წმ. ასურელი მამებისა და ქართლის კათალიკოს კირიონ I-ის ღვაწლისა. კირიონ I-მა, როგორც ცნობილია, თავის ერთერთ ეპარქიაში, გუგარქში, ქართველებს ეკლესიებში აღუდგინა ქართულენოვანი წირვა-ლოცვა. საქმე ის იყო, რომ მე-6 საუკუნეში, **მეუფე ანანიას** სიტყვით, გუგარქის ქართულ ეკლესიებში სომხურენოვნება დაინერგა პოლიტიკური მიზეზების გამო სპარსეთის იმპერიის ნებით და ეს პრაქტიკა კირიონმა აღმოფხვრა - აღადგინა ქართულენოვნება. კირიონს სულიერად აძლიერებდა ასურელი მამების ღვაწლი, ქართული ენის მიმართ მათი დამოკიდებულება.

ასურელი მამების ცხოვრება აღგვიწერს ქართული ენის მიმართ უზენაეს გამორჩეულობას - ეთნიკურ ასურელებს იოანე ზედაზნელსა და შიო მღვიმელს უფალმა ღმერთმა წამისყოფით, მყისიერად მიანიჭა ქართული ენის ცოდნა და გამოაგზავნა ისინი ქართველთა შორის საქადაგებლად, წერს მეუფე.

ქართული ენის მიმართ ეს საღმრთო მადლმოსილება, ანიშნავს **მეუფე ანანია**, ქვემო ქართლიდან და გუგარქიდან განივრცო VII-VIII საუკუნეების ტაო-ბასიანსა და სხვა არეებში, რამაც გამოაფხიზლა უკვე სომხური ეკლესიის წევრად გადაქცეული აქაური ქართველები, აღძრა მათში სურვილი იქამდე დევნილი, დაფარულად მოსახმარი ანუ „დამარხული“ ქართული ენა ეკლესიებში გადაექციათ წირვა-ლოცვის ენად, რათა სამხრეთის ივერიის ანუ უკვე არმენიის მიერ ხელდებული ივერიის ეკლესია-მონასტრებიდან განედევნათ სომხური ენა და მის ნაცვლად ლიტურგიკულ ენად თავიანთი მშობლიური ქართული ენა დაედგინათ. ამ მოლოდინის გამოძახილად მიაჩნია **მეუფე ანანიას** შექმნა ძეგლისა, რომელსაც ეწოდება „ქებაი და დიდებაი ქართულისა ენისაი“.

სამხრეთს ამ ივერიის ეკლესიებში ქართულენოვნების დაბრუნების აღწერილი პროცესი - დასძენს მეუფე ანანია - იყო ურთულესი და ის მიმდინარეობდა VI საუკუნის შემდეგ, ძირითადად VII და განსაკუთრებით VIII საუკუნის პირველ ნახევარში. აქაურ ეკლესია-მონასტრებში ქართულენოვანი ღვთისმსახურების აღორძინდამ ხელი შეუწყო აქაური ქართველების ეროვნულ გაძლიერებას, რაც IX-X საუკუნეებში დაგვირგვინდა ტაოს ქართველთა სამეფოს წარმოქმნით.

აღსანიშნავია, რომ მსგავსადვე ამ ეპოქაში VI-VII საუკუნეებში ალბანური ეკლესიაც დაიქვემდებარა სომხურმა ეკლესიამ, მაგრამ, ალბანელებმა ვერ

შეძლეს სომხური ეკლესიური უღლისაგან გათავისუფლება, მისგან განსხვავებით, ყოფილი არიან-ქართლის ანუ ტაოს, ბასიანის, არზრუმისა და სხვა რეგიონებში მცხოვრებმა ქართველებმა შეძლეს სომხური ეკლესიის უღლისაგან გათავისუფლება, აქ ჩამოყალიბდა კიდევ ქართველი მრევლისათვის ანისის, ყარსის, ვალაშკერტისა და სხვა ქართული საეპისკოპოსოები, რომელნიც დიდხანს ფუნქციონირებდნენ.

ასეთია **მიტროპოლიტ ანანია ჯაფარიძის** საბოლოო დასკვნა არიან-ქართლზე.

კიდევ ძალიან ბევრი შეიძლება ითქვას **მეუფე ანანიას** უზარმაზარ – 566 გვერდიან მონოგრაფიაში აღძრული მრავალი და მეტად საინტერესოდ წარმოდგენილი საკითხების – განსაკუთრებით საეპისკოპოსოების შესახებ, მაგრამ მონოგრაფიის შეფასება ისედაც გამიგრძელდა. მე მინდა ჩემი გამომხაურება მეუფის მონოგრაფიაზე ამით დავასრულო და **მეუფე ანანიას** ვუსურვო კვლავ ასეთი შემართებით განაგრძოს საქართველოს ისტორიისა და საქართველოს სამოციქულო ეკლესიის აქტუალური საკითხების კვლევა.

2016 წ.

